

劉

氏

鴻

書

第一百五卷

紀廳部八

補遺二

官人

方服

四維

藍莫國

五病

八柱

配十二時

書運

卞和

夏姬

辭疾

陰禍

妬婦

良介

倉梧尾生

阿沙不花

巉巉

更正僧人

西湖醉老

徐天全詩

漁詩苦樂

富有時

蛇王

白燕詩

分崔集古

六備

有道者處之

伐國之因

日費千金

思親操

孔子操

大言賦

小語賦

百年謔

四時謔

慷慨謔

苦寒行

隴西行

東門行

置酒高堂上

背背鹽

元朝總斷

劉氏鴻書卷一百五

明 宣城劉仲達 纂輯

太史湯賓尹 刪正

紀龐部八

補遺二

王者官人六等一曰師二曰友三曰大臣四曰左右五  
曰侍御六曰廝役智足以爲源泉行足以爲表儀謂之  
師智足以爲礪礪行足以爲輔助謂之友智足以謀國  
事行足以爲民率謂之大臣也修身正行不憊於鄉曲  
左右也事君不敢有二心侍御者也唯言之聽以事君

者廝役也

賈誼新書

凡王畿其外方五百里曰侯服又其外方五百里曰甸服又其外方五百里曰男服又其外方五百里曰采服又其外方五百里曰衛服又其外方五百里曰蠻服又其外方五百里曰夷服又其外方五百里曰鎮服又其外方五百里曰蕃服

周官

國有四維一維絕則傾二維絕則危三維絕則覆四維絕則滅傾可正危可安覆可起滅不可得復也四維一曰禮二曰義三曰廉四曰恥又曰堯舜之民非生而治桀紂之民非生而亂故治亂在上又曰聖君設度量置

儀法如天地之堅如列星之固如日月之明如四時之  
信然正令往而民從之

管子

迦維羅衛國從佛生處東行五由旬有國名藍莫此國  
皇得佛一分舍利還歸起塔塔邊有池池中有龍常守  
護此塔晝夜供養乃有羣象以鼻取水灑地取雜花香  
而供養諸國道人來欲禮拜塔遇象大怖依樹自翳見  
象如法供養道人太息悲感卽舍大戒還作沙彌自挽  
水平治處所使得淨潔

法顯記

夫失道者放逸其心逆於生樂以精神徇智巧以憂畏  
徇得失以勞苦徇禮節以身世徇財利四徇不置心爲

之病矣極力勞形課暴氣逆當風縱酒食嗜辛鹹肝爲  
之病矣飲食生冷溫涼失度久坐久臥大飽大饑脾爲  
之病矣呼呌過常辯爭倍答冒犯寒暄恣食鹹苦肺爲  
之病矣久坐濕地強力入水縱欲勞形三田漏溢腎爲  
之病矣五病旣作故未老而羸未羸而病病至而重重  
則必斃嗚呼是皆弗思而自取之也

本草衍義序

地下有八柱柱廣十萬里有三千六百軸互相牽制名  
山大川孔穴相通按此則八柱宜擎地者而張說爲姚  
崇墓表乃云八柱擎天似誤用矣

河圖括地象

一日百刻配十二時之數有謂子午二時則十刻其餘

十時皆八刻者有謂時自時刻自刻不相干涉者惟三

山林永叔謂一時得八刻十二時得九十六刻尚餘四

刻又以每刻分爲六十分四刻計二百四十分布之十

二時之間則每一時得八刻二十分故有先初初刻者

十分也正初刻者十分也且以卯言之先初初刻十分次

初初刻六十分初二刻六十分初三刻六十分初四刻六十分正

初刻十分正一刻六十分正二刻六十分正三刻六十分正四刻

六十分總而計之則一時得八刻二十分見矣今之百中

經所載每時有八刻三分三秒而於分之極處難於結

絕終不如林說爽明林之先初初刻與正初刻雖立兩



款皆不可以實刻筭直因派有二十分姑增立此二名  
爾與他八刻各占六十分者不同所謂時刻不相干者  
未必無見

鳥衣佳話

人間世諸物皆有聚有散豈能久存而書爲甚且多罹  
火災隋牛弘請開獻書之路極論述五厄之說書之厄  
也久矣今撫其槩言之梁元帝江陵蓄古今圖書十四  
萬卷隋嘉則殿書三十七萬卷唐惟貞觀開元最盛兩  
都各聚書四部至七萬卷宋宣和保和殿太清樓龍圖  
閣御府所儲尤盛於前代今可考者崇文總目四十六  
類三萬六百六十九卷史館一萬五千餘卷餘不能具

數百濟以後復加集錄館閣書目五十二類四萬四千四百八十六卷續目一萬四千九百餘卷是皆藏於官者耳若士大夫家所藏在前世如張華載書三十車杜兼至萬卷韋述所蓄二萬卷鄴侯李繁插架三萬卷金樓子聚書八萬卷唐吳兢西齋一萬三千四百餘卷宋南都戚氏歷陽沈氏廬山李氏九江陳氏番陽陳氏王文康李文正宋宣獻晁以道劉壯輿皆號藏書之富邯鄲李淑五十七類二萬三千一百八十餘卷田鎬三萬卷昭德晁氏二萬四千五百卷南都至四萬三千餘卷而類書浩博若太平御覽合璧事類等書不與焉次如

曾南豐及李氏山房亦皆一二萬卷其後無不厄於兵火者他如石林葉氏多至十萬卷齊齋倪氏月河莫氏竹齋沈氏程氏賀氏皆號藏書之富各不下數萬餘卷亦皆散失無餘宋末惟直齋陳氏書最多至五萬一千八百餘卷且倣讀書志作解題極其精詳後亦散失于兵火至於蜀中三李秀岩東牕鳳山三族號爲史家所藏僻書尤多後亦無餘周公謹家三世積書凡有四萬二千餘卷及三代以來金石刻一千五百餘種後皆厄於火又聞浦陽義門鄭氏藏書極多家有藏書樓若干間其頗是建文所書擘窠大字御書樓三字蓋我

太祖駐蹕金華時賜有御札藏其間後亦被焚所藏書  
有八萬餘卷古名賢墨跡畫刻亦不下五六百種皆付  
煨燼可勝惋惜

鳥衣佳話

卞和者楚野民得玉獻懷王懷王使樂正子占之言玉  
石以爲欺謾斬其一足懷王死子平王立和復獻之平  
王又以爲欺恐復斬其一足平王死荆王立和復欲獻  
之見害乃抱其玉而哭晝夜不止涕盡續之以血荆王  
遣問之於是和隨使獻王王使剖之中果有玉乃封和  
爲陵陽侯卞和辭不就而去作退怨之歌曰悠悠沂水  
經荆山精氣鬱浹谷巖中中有神寶灼明明穴山采玉

難爲功於何獻之楚先王遇王閭昧信讒言斷截兩足  
離余身俛仰嗟歎心摧傷紫之亂朱粉墨同空山歔歔  
涕龍鍾天鑒孔明竟以彰沂水滂沛流於汶進寶得刑  
足離分斷者不續豈不怨

琴操

夏姬者陳大夫徵舒母也狀美好老而復壯者三三爲  
皇后諸侯爭之莫不迷惑陳靈公與孔寧儀父皆通焉

或衣或裝或裝其播

播蔽昧衣

以獻於朝

列女傳

高彪謁馬融辭疾不見彪覆刺與書曰聞高風爲日久  
矣故不待介者造君子之門冀一見龍光敘腹心之願  
不圖辭之以疾昔者周公兄父文武九命作伯以君華

夏猶握沐吐食以接白屋之士天下歸德歷載邈矣今君不能相見宜哉融省書大慙遣人辭謝追請徑去不還

漢雜事

漢陳平嘗言我多陰謀道家之所禁吾世卽廢不能復起以吾多陰禍也李廣與望氣王朔語曰吾爲隴西守羗嘗反吾誘降者八百餘人詐而同日殺之今恨獨此爾朔曰禍莫大於殺已降此乃將軍之所以不得侯者也後漢虞詡臨終謂其子恭曰吾所悔者爲朝歌長時殺賊數百人其中何能不有冤者自此二十餘年家門不增一口期獲罪於天也宋王彥超將致政每戒諸子

曰吾累爲統帥殺人多矣自死得免爲幸必無陰德以  
及後汝爲善事以自庇及卒子孫果無達者史稱彥超  
自悔多殺垂戒後裔近乎仁人之用心矣若漢陳平輩  
之所言者比之彥超其用心得無亦有類焉者乎而彥  
超同時若曹彬其人乃真爲仁人矣爲將亦在人自處  
何如爾

書永編

馮敬通有一婢妻任酷妬之擊婢無所不至敬通乃棄  
之因與婦弟任武達書曰不去此婦則家不寧不去此  
婦則家不清不去此婦則福不生不去此婦則身不榮  
不去此婦則事不成吾數奇命薄端相逢遭

敬通集

後漢馬良使吳良謂諸葛亮曰今銜國命協睦二家幸  
爲良介於孫將軍亮曰君試自爲文良卽爲草曰寡君  
遣掾馬良通聘繼好以紹昆吾豕韋之勳其人吉士荆  
楚之令鮮於造次之華而有克終之美願降心有納以  
慰將命權大悅之

蜀志

昔倉梧丙娶妻美而與其兄欲以爲讓也則不如無讓  
焉尾生與婦期於水邊暴水至而不去欲以爲信也則  
不如無信焉葉公之黨其父攘羊而子證之欲以爲直  
則不如無直焉陳仲子不食母之粟出居於陵欲以爲  
廉則不如無廉焉宗魯受齊豹之謀死孟軻之難欲以



爲義則不如無義焉

至大元年春正月以阿沙不花爲右丞相初爲都指揮使時帝封懷寧王總兵漠北問人才孰可大用阿沙不花對曰母弟脫脫將相才也遂命脫脫從行後果爲名臣及帝卽位之後有所愛近臣命賜鈔千五萬貫阿沙不花頓首曰以蹴鞠而受上賞則奇技淫巧日進而賢者日退矣將如國家何臣死不敢奉詔乃止帝嘗御五花殿丞相塔思不花三寶奴等侍阿沙不花見帝容色日悴乃進曰八珍之味不知御萬金之身不知愛惟麴蘖是好姬嬪是耽是猶兩斧伐孤樹未有不顛仆者帝

喜曰非卿孰爲朕言因命進酒又頓首曰臣方欲陛下  
節欲而反勸之是臣之言不信於陛下也臣不敢奉詔  
左右皆賀帝得直臣遂拜右相

元史

至正年翰林承旨巉巉卒初巉巉知經筵日勸帝就學  
帝欲寵以師禮固辭不可帝嘗欲觀畫巉巉取比干圖  
以進一日帝覽宋徽宗畫稱善巉巉進曰徽宗多能惟  
一事不能帝問一事謂何對曰獨不能爲君爾身辱國  
破皆由不能爲君所致凡爲人主貴能爲君他非所尚  
也其隨事規諫皆類此嘗謂人曰天下事宰相當言宰  
相不得言則諫臺言之諫臺不敢言則經筵言之備位

經筵得言人所不敢言於天子之前志願足矣故於時  
政得失有當匡救者未嘗緘默至是卒巉巉善真行草  
書片紙之存人爭寶之不啻金玉

元史

元泰定年禁西僧馳驛擾民先是西臺御史李昌言嘗  
經平涼府靜會定西等州見西番僧佩金字圓符絡繹  
道途馳騎累百傳舍至不能容則假館民舍因迫逐男  
子奸汚婦女奉元一路自正月至七月往返者百八十  
五次用馬至八百四十餘匹較之諸王行省之使十多  
六七驛戶無所控訴臺察莫得誰何且國家之製圓符  
本爲邊防警報之虞僧人何事而輒佩之乞更正僧人

給驛法且令得以糾察不報至是聞其擾民禁之

綱鑑

杜肩字公序號西湖醉老以詩名永樂間其過赤壁詩云水軍東下本雄圖千里長江隘舳艫諸葛心中空有漢曹瞞眼裏已無吳兵消炬影東風猛夢斷簫聲夜月孤過此不堪回首處荒磯鷗鳥滿煙蕪一時人皆傳誦稱曰杜赤壁又虛齋曹翰卿詩云白石江頭烈火紅千年遺事說東風不知畫史將何意不畫周郎畫長公亦有意味吳匏應詩云西飛孤鶴記何詳有客吹簫楊世昌當日賦成誰與註數行石刻舊曾藏世昌綿竹道士與東坡同遊赤壁賦所謂客有吹洞簫者卽其人也微

匏庵表而出之世昌幾無聞矣

鳥衣佳話

武功伯徐天全先生集其禁垣夜直之詩云碧天如水  
睿光流風物清新滿帝州雲裏笙歌雙闕迥月中砧杵  
萬家秋蓬萊樹色連瓊島太液波聲接玉溝獨有玉堂  
人不寐六箴將曉獻宸旒此詩卓然唐人風度

新知錄

詩人志向各自不同如題漁父之作有美其山水之樂  
者有憫其風波之苦者陸龜蒙云一艇輕櫂看晚濤接  
離拋下漱春醪相逢便倚蒹葭浦更唱菱歌劈蟹螯鄭  
谷云白頭波上白頭翁家逐船移滿浦風一尺鱸魚新  
釣得呼兒吹火荻花中江陰下戶部

華伯榮

云天外閒雲

物外情功名真似一絲輕浪花深處漁如舞只爲心安  
不受驚祝希哲云荻花風緊水生鱗山色浮空淡抹銀  
總道江南好風景從前都屬打魚人是皆羨其樂也李  
西涯云漁家生事苦難勝盡日江頭未滿罾回首不知  
天已暮晚風吹浪濕鬚髻唐子畏云朱門公子饌鮮鱗  
爭詫金盤一尺銀誰信深溪狼虎裏滿身風雨是漁人  
文徵明云小舟生長五湖濱雨笠風蓑不去身三尺銀  
編數斤鯉長年辛苦只供人是皆憐其苦也屬意雖不  
同而寫景咏物各極其妙

烏衣佳話

洪武初峴山富室有徐富九居積甚饒而田產園亭之

盛莫與爲儷一日驅車往州望見道上一蚯蚓長而且大其色如血富九心甚怪之因馬行驟不能久視猶回首戀戀不已後見一婦人俯身若有所拾富九勒馬以候其來問之婦不能隱乃出一金釵告曰此纔拾者富九聞其語縱之去因歎曰精金變幻有如此者見而不我得而歸於一婦人我時去矣我禍速矣歸以田產盡散族人及貧乏者穹堂遂宇一火盡之孑然如素貧者越三月朝廷知其豪富遣使籍其家至則蕩然一空竟以獲免全生以終天年蓋亦知幾之哲人矣

烏衣佳話

世傳方遜志先墓有蛇穴其祖欲焚之夜夢一人來祈

曰我蛇王也容三日徙去方不可其人曰殺我能致汝  
滅族遂寤明旦焚蛇千萬而孫婦挽身得男故先生平  
生好以舌舐唇如蛇果致赤族之禍按江湖紀聞吳玠  
以殺金平多樹木能藏金謀者欲焚之一媪懇云容三  
日徙去必殺我我滅汝族玠不聽遂焚之其日有氣一  
道飛入玠子婦室產孫曦果以降金誅滅

御河東畔柳條春天女驚看色更新飛絮乍迷波上影  
避風初化掌中身霓裳散采人如玉雪羽凝寒月似銀  
愛爾素衣能不染詎愁京洛有緇塵

張之象

昭陽宮裏洗

新粧粉黛三千枉斷腸不是樓臺凉似水誰教毛羽化



爲霜河邊度影銀生色花底銜泥玉有香莫向衆中跨

素質蛾眉偏妬雪衣娘

李先芳

曾是烏衣國裏身玉樓瓊

榭換丰神雙飛剪出機中素獨立收成掌上人月下步

搖花有態水邊飄動襪生塵陳王亦自多情調洛浦相

逢總未真

黎民表

差池素羽度銀潢亂入楊花拂苑牆神

女江邊瓊作佩天孫月下玉爲粧雙棲曾憶連珠樹獨

語俄驚點盡梁春色上林堪自媚翻飛還欲向昭陽

吳守

海上遙思玳瑁梁御溝東畔幾迴翔瑤臺乍過疑無影

珠樹曾棲半帶霜風裏差池飛玉舄月中粧束舞霓裳

誰云京洛縑塵化猶有銜恩繞建章

歐大任

玉河白燕

楚中有一縉紳崔公鶴樓詩分作八首集古句成之今  
錄於後昔人已乘白雲去江海茫茫何處尋芳草連天  
迷遠望薄雲籠日弄輕陰一春魚鴈無消息萬里江山  
自古今百尺朱樓閒倚遍洞庭猶憶在前林○此地空  
餘黃鶴樓成仙人去幾千秋雲飛雨散知何處葉落猿  
啼傍客舟天水混融浮太極野煙踪跡似東周此時悵  
望人多少仙鶴空成萬古愁○黃鶴一去不復返白雲  
長在水潺潺如何一諷神仙事却望千門草色間城下  
煙波春拍岸湖中西日倒銜山征帆去掉殘春裏飛鳥  
空慙倦未還○白雲千載空悠悠物換星移幾度秋縱

酒欲謀良夜醉放歌曾作昔年遊長安北望三千里大  
府南來第一州前後登臨思無盡思歸時亦賦登樓○  
晴川歷歷漢陽樹却惹空山舊曉煙樓上北風斜捲席  
洞庭秋水遠連天公車未結王生襪壯志仍輸祖逖鞭  
黃鶴樓中吹玉笛水寒煙淡落花前○芳草淒淒鸚鵡  
洲謝公此地昔曾遊鳥啼花發人何在仙去臺空跡尚  
留知愛魯連歸海上共嗟王粲滯荊州高樓惆悵凭欄  
久惟見長江天際流○日暮鄉關何處是杜陵遠客不  
勝愁終期直道扶元化敢負吾君作楚詞北極朝廷終  
不改楚天雲雨盡堪疑酒酣往事多興念黃鶴樓前吹

笛時○煙波江上使人愁幾度高吟寄水流花界三千  
春渺渺銀河一帶水悠悠仙人有待乘黃鶴身外無機  
任白頭遙望洞庭山水色春風一夜帶歸舟

鳥衣佳話

文王問太公曰何如而可爲天下太公曰大蓋天下然  
後能容天下信蓋天下然後能約天下仁蓋天下能懷  
天下恩蓋天下能保天下權蓋天下然後不失天下事  
而不疑則天下不能移時變不能遷此六者備然後可  
以爲天下政

六韜

故利天下者天下啓之害天下者天下閉之生天下者  
天下德之殺天下者天下賊之徹天下者天下通之窮

天下者天下仇之安天下者天下恃之危天下者天下  
災之天下者非一人之天下惟有道者處之

六韜

昔日周武王問太公曰吾欲少間謀而極用人之要呂  
望對曰視賞如登山之高視罰如谿水之深太上之人  
自無過舉其次者貴於補過使下人無得私語而議上  
諸罰有罪而請不罰者死諸賞有功而請不賞者死伐  
人之國必因其國之有變而伐之示之財貨以觀其國  
之窮否示之困弊以觀其人之病否彼在上者乖張而  
在下者離散此伐國之因也

尉繚子

孫子曰凡興師十萬出征千里百姓之費公家之奉日

費千金內外抵動怠於道路不得操事者七十萬家

○古者八家同井一夫出征七家皆不得安也

孫武子

陟彼歷山兮崔嵬有鳥翔兮高飛瞻彼鳩兮徘徊河水  
洋洋兮青泠深谷鳥鳴兮嚶嚶設罾張置兮思我父母  
力耕日與月兮往如馳父母遠兮吾當安歸

虞舜思親  
悌

周道衰微禮樂凌遲文武既墜吾將焉歸周遊天下靡  
邦可依鳳鳥不識珍寶梟鴟眷然顧之慘然心悲巾車  
命駕將適唐都黃河洋洋悠悠之魚臨津不濟還轍息  
鄢傷予道窮哀彼無辜翱翔于衛復我舊廬從吾所好  
其樂只且

孔子陳操

楚宋玉大言賦曰楚襄王與唐勒景差宋玉遊於陽雲之室王曰能爲寡人大言者上座王因稱曰操是太尉戮匿流血冲天車不可以厲至唐勒曰壯士難兮絕天維北斗戾兮太山夷至宋玉曰方地爲車圓天爲蓋長劒耿介倚天外王曰未可也玉曰并吞四夷飲枯河海跂越九州無所容止賦卒而宋玉受賞又曰有能爲小言賦者賜之雲夢之田景差曰戴氛埃兮垂溷塵體輕蚊翼形微蚤鱗經由鍼孔出入羅巾唐勒曰折飛糠以爲與剖粃糟以爲舟憑蝸蟻以顧眄附蟻蠓而遐遊又

曰館于蠅髮宴于毫端烹虱腦切蟻肝會九族而同嗜  
猶委餘而不殫宋玉曰無內之中微物潛生比之無象  
言之無名蒙蒙景滅昧昧遺形織於蠹末之微篋陋於  
茸毛之方生視之則眇眇望之則冥冥離朱爲之歎悶  
神明不能察其情二子之言磊磊皆不小何如此之爲  
精王善賜雲夢之田

文選

晉傅咸小語賦曰楚襄王登陽雲之臺景差唐勒宋玉  
符王曰能爲小語者處上位景差曰么蔑之子形難爲  
象晨登蟻埃薄暮不上朝炊半粒晝復得釀亭一小虱  
飽於鄉黨唐勒曰攀蚊髯附蚋翼我自謂重彼不極難



通有急相切逼竄於針孔以自匿宋玉曰折薛足以爲  
擢舫粒糠而爲舟將遠遊以遐覽越蟬溺以橫浮若涉  
海之無涯懼湮沒於洪流彌數旬而汔濟陟蟻蟻之崇  
丘未升半而九息何時遠乎杪頭

晉陸機百年歌曰一十時顏如舜華睡有暉體如飄風  
行如飛終朝出遊薄暮歸六情逸豫心無違清酒將炙  
柰樂何清酒將炙柰樂何二十時膚彩津澤人理成美目  
淑貌灼有榮光車駿馬遊都城高譚雅步何盈盈清酒  
將炙柰樂何清酒將炙柰樂何三十時行成名立有令  
聞力可扛鼎志干雲食如漏卮氣如熏蕕家觀國綜典

文清酒將炙柰樂何清酒將炙柰樂何四十時體力克  
壯志方剛跨州越郡還帝鄉出入承明擁大璫清酒將  
炙柰樂何清酒將炙柰樂何五十時施杖節鎮邦家鼓  
鍾嘈囋趙女歌羅衣綵綵金翠華言笑雅舞相經過清  
酒將炙柰樂何清酒將言柰樂何六十時年亦耆艾葉  
亦隆驂駕四牡入紫宮軒冕姁那翠雲中子孫昌盛家  
道豐清酒將炙柰樂何清酒將炙柰樂何七十時精爽  
頗損膂力愆清水明鏡不欲觀臨樂對酒轉無歡攬形  
修髮獨長歎八十時明已損聰去耳前言徃行不復紀  
辭官致祿歸桑梓安車駟馬入舊里樂事告終憂事始

九十時日告耽庠月告衰形體雖是志意非言多謬誤  
心多悲子孫朝拜或問誰指景玩日慮心安危感念平  
生淚涕交揮百歲時盈數已登肌肉單四支百節還相  
患日若濁鏡口垂涎呼吸嚕蹙反側難茵褥滋味不復  
安

藝文類聚

梁武帝春歌曰堦下香入懷庭中花照眼春心一如此  
情來不自恨又夏歌曰江南蓮花水紅光復碧色同絲  
有同藕異心無異荷又秋歌曰繡帶合歡結錦衣連理  
文懷情入夜月含笑出朝雲又團扇歌曰手中白團扇  
淨如秋圓月清風任動生嬌香乘意發又襄陽白銅鞮

歌曰龍馬紫金鞍翠眊白玉羈照曜雙闕下知是襄陽  
兒

貪吏而可爲而不可爲廉吏而可爲而不可爲貪吏而  
不可爲者當時有污名而可爲者子孫以家成廉吏而  
可爲者當時有清名而不可爲者子孫困窮被褐而負  
薪貪吏常苦富廉吏常苦貧獨不見楚相孫叔敖廉潔  
不受錢

後孟忱諫詩

北上太行山艱哉何巍巍羊腸坂詰屈車輪爲之摧樹  
木何蕭瑟北風聲正悲熊羆對我蹲虎豹夾路啼谿谷  
少人民雪落何霏霏延頸長嘆息遠行多所懷我心何

拂爵思欲一東歸水深橋梁絕中路正徘徊迷惑失故  
路薄春無宿棲行行日已遠人馬同時饑擔囊行取薪  
斧冰持作糜悲彼東山詩悠悠使我哀

魏武苦寒行

天上何所有歷歷種白榆桂樹夾道生青龍對道隅鳳  
凰鳴啾啾一母將九雛顧視世間人爲樂甚獨殊好婦  
出迎客顏色正敷愉伸腰再拜跪問客平安不請客北  
堂上坐客氎氎觥清白各異樽酒上正華疏酌酒持與  
客客言主人持却畧再拜跪然後特一杯談笑未及竟  
左顧敕中厨促令辦麋飢慎莫使稽留廢禮送客出盈  
盈府中趨送客亦不遠足不過門樞取婦得如此齊姜

亦不如健婦持門戶亦勝一丈夫

占隴西行

東臨碣石以觀滄海水何澹澹山島竦峙樹木叢生百  
草豐茂秋風蕭瑟洪波湧起日月之行若出其中星漢  
燦爛若出其裏幸甚至哉歌以詠志

觀滄海一解

孟冬十月

北風徘徊天氣肅清繁霜霏霏鷓鴣雞晨鳴鴻鴈南飛鷺  
鳥潛藏熊羆窟棲錢鏰停置農收積場逆旅正設以通  
賈商幸甚至哉歌以詠志

冬十月二解

鄉土不同河朔隆寒

流澌浮漂舟船行難雖不入地豐贖深與水竭不流水  
堅可蹈士隱者貧勇俠輕非心常歎怨戚戚多悲幸甚  
至哉歌以詠志

河朔寒三解

神龜雖壽猶有竟時騰蛇乘霧

終爲土灰老驥伏櫪志在千里烈士暮年壯心不已盈  
縮之期不但在天養怡之福可得永年幸甚至哉歌以  
詠志

龜雖壽四解。魏武東門行。

置酒晏友生高會臨踈櫺芳俎列嘉肴山壘滿春青廣  
樂充堂宇絲竹橫兩楹邯鄲有名倡承間奏新聲八音  
何寥亮四座同歡情舉觴發湛露銜杯諫鹿鳴謠可  
相娛揚解意何榮顧歡來義士暢哉矯天誠朝日不夕  
盛川流常宵征生猶懸水溜死若波瀾停當年貴得意  
何能競虛名

宋孔欣置酒高堂上

垂柳覆金堤靡蕪葉復齊水溢芙蓉沼花飛桃李蹊採

桑秦氏女織錦寶家妻關山別蕩子風月守空閨恒歛  
千金笑長垂雙玉啼盤龍隨鏡隱彩鳳逐帷低飛翬同  
夜鵲倦寢意晨雞暗牖懸蛛網空梁落燕泥前年過代  
北今歲往遼西一去無消息那能惜馬蹄

薛道衡昔昔  
鹽

元太祖深沉太畧用兵如神故能滅國四十遂平西夏定  
西域太宗有寬弘之量信任賢臣量時度宜庶民樂業  
時稱治平約宋滅金國勢愈昌定宗以母后稱制加之  
連年大旱人不聊生憲宗雄毅寡言不好宴侈屢立大  
功至世祖帝仁明英武故能混一區宇坐致太平求賢  
納練知人善任矣臣如許衡姚樞劉秉忠史天澤王鶚



李道復等謀謨廟堂武將如伯顏阿里海涯張弘範李  
恒董文炳等攻城掠地大闢嘉猷制禮作樂民物阜康  
夷狄之盛古未有也成宗垂拱而治善於守成武宗封  
爵太盛至元大德之政稍有變更仁宗聰明恭儉通達  
儒術受養民力孜孜爲治一遵世祖成憲爲元盛德守  
文之主矣英宗用法無私果於誅戮奸黨畏罪遂爲所  
弑泰定以支庶入繼災異數見君臣之間未見其引咎  
責躬之實然能知祖宗之法以行天下無事號稱治平  
斯其足稱明宗迎立朔漠文宗攝位改元行幄暴崩文  
宗難逃弑逆詔除廟主豈不宜哉寧宗幼冲月餘而斃

至于順帝性柔少斷奸臣伯顏哈麻相繼弄權朝政由  
紊至元三年廣州賊朱光卿自稱大金國自後群盜蜂  
起稱弥勒佛治世迭興迭滅至正十一年妖人劉福通  
徐壽輝等又以白蓮會燒香聚衆紅巾爲號天下大亂  
時韓林兒據中原陳友諒據湖廣方國珍據浙東張士  
誠據浙西胡玉珍據四川陳有定據福建何真據廣東  
劉益據遼陽毛貴田豐據山東朝廷命將如擴廓帖木  
兒孛羅帖木兒李思齊張良弼等自爲讐敵連年攻擊  
帝復不悟迎西蕃僧行運氣之術教宮女作天魔之舞  
不恤政事荒於淫樂致群雄割據稱帝稱王垂二十年

曆數屬於大明四海九州復歸一統於戲盛哉是歲  
戊申春正月我太祖聖神文武欽明啓運俊德成功  
統天大孝高皇帝登寶位于南京建元洪武元年復中  
國之統國號曰大明傳國祚於萬萬年矣

黎古岡論

第一百六卷

紀龐部力

補遺三

十數

杞憂

五事

百八道君

不雨

殷人喜

殷國妖

靈王二臺

南子

銅鞮伯華

阮師刀

七扎弓

夢赤熊

罷推車

鑿涇水

獻豕

當武安君

姬爭后

未知稅駕

弗與一布

嫪毐驕奢

蠡舟墨水

陛下已壯

大怒干齋

王慙更服

戒微行

曹褒正禮

張奐伏羗

萬世之秋

誠兄子

長久之計

中台之位

抵肉

督郵顏回

奇名字

曹植詩

報父讐

吾志足矣

不能爲郎

羊陸交讐

戲般

携箸飲噉

祭梁鴻文

當求柱國

綠珠篇

東國西國

龍淵善相

天子在門

着百戲衣

餅說

張僧繇

急流

三穴

沈光誓戰

殿脚女

無粉本

剩天子

秦叔寶

勾當羣牧

張紅

佛寶諸香

靈芳國

與朕作主人

飲鴆不死

甘露羹

小女拒賊

高歡趣蒲津

鄧氏剛決

殺雞刀

嬖妾解愁

蜀王衍

李景讓母

軍莫有變

議汰冗食

能子能臣

三洲人

芍藥名將離

易林深旨

儒吏論

宋玉賦

古樂府

琴歌編蓬

菊水芳馨

情不能已

卜放

於陵先生

張循王兄

劉氏鴻書一百六

明宣城劉仲達纂輯

紀龐部九

太史湯賓尹刪正

補遺三

十數魯有大野今高平鉅野東北大澤也晉有大陸今鉅鹿北廣河澤也秦有陽陁今扶風汧縣西也宋有孟諸今梁國睢陽縣東北也楚有雲夢今南郡華容縣東南巴丘湖也吳越之間有具區今吳縣南太湖卽震澤也齊有海隅海濱廣斥燕有昭余祁今太原鄆陵縣北澤是也鄭有圃田今滎陽中牟西圃田澤是也周有焦



護今扶風池陽縣瓠中是也

爾雅

杞國有人憂天崩地墜身無所寄廢寢與食又有憂彼所憂往曉之曰天積氣耳其人曰天果積氣日月星宿不當墜耶對曰日月星宿亦積氣中之有光耀者只使墮亦不能中傷其人曰柰地壤何對曰地積塊耳充塞四虛何憂其壞其人大喜

列子

爰用五事建用皇極一曰貌貌之不恭是謂不肅厥咎枉厥罰常雨厥極惡時則有龜孽時則有雞禍次二曰言言之不從是謂不乂厥咎僭厥罰常陽厥極憂時則有詩效時則有介蟲之孽時則有大禍三曰視視之不

明是謂不哲厥咎豫厥罰常燠厥極疾時則有草妖

則有果蟲之孽次四曰聽

聽之

不聰是謂不謀厥咎急厥

罰常寒厥極貧時則有鼓妖時則有豕禍火五曰思思之不睿是謂不聖厥咎霧厥罰常風厥咎凶短折時則有脂夜之妖時則有垂孽時則有牛禍王之不極是謂不建厥咎霧厥罰常陰厥極弱時則有射妖時則有龍蛇之孽時則有馬禍時則有日月亂行星辰逆行

尚書

大傳

玉皇諸錄有百八道君羣仙隨業以補其職三善道者聖真仙也上品曰聖中品曰真下品曰仙三清之間各

有正位聖登玉清真登上清仙登太清玉清有太省宮  
殿皇帝王公卿大夫吏民率以聖呼之如聖皇聖帝之  
類是也男女貴賤各有次第上清有玄都玉京七寶紫  
微率以真呼之太清有太極宮殿率以仙呼之其上清  
太清品位列男女次第之統數與玉清同

大真科

春夏兩日而不雨甲乙命爲青龍又爲火龍東方小童  
舞之丙丁不雨命爲赤龍南方壯者舞之戊巳不雨命  
爲黃龍壯者舞之庚辛不雨命爲白龍又爲火龍西方  
老人舞之壬癸不雨命爲黑龍北方老人舞之如此不  
雨潛處闔南門置水其外開北門取人骨埋之如此不

雨命巫祝而暴之暴之不雨神山積薪擊鼓而焚之

農求雨書

武王入殷商都置旌於商容之廬命召公釋箕子之囚  
賜貝千朋命原公釋百姓之囚歸琬臺之珠玉命南宮  
适散鹿臺之財發巨橋之粟以賑貧民命南宮伯達史  
逸遷九鼎於洛邑命周天封比干之墓命宗祀饗祀於  
軍微子膠鬲皆委質爲臣殷人咸喜曰王之於人也死  
猶封其墓況其生者乎王之於賢仁也亡者猶表其廬  
况其存者乎王之於財也聚者猶散之况其復藉者乎  
王之於色也在者猶歸其父母况復徵之乎

帝王世紀

武王伐殷得二丈夫而問之曰殷國之將亡亦有妖或  
乎其一人對曰有殷國嘗有兩石大者如甕小者如箕  
嘗六月而雪深尺餘其一人對曰是非殷國之大妖也  
殷國之大妖四十七章殷君喜殺人喜以人飴虎喜割  
人心喜殺孕婦喜殺人之父狐人之子喜刑禍喜以信  
爲欺欺者爲忠忠諫者不實以君子爲下小人爲上以  
便佞爲相政苛令暴萬民愁苦奸田獵畢弋走狗飾爲  
喜修池臺宮七十有三所大宮百里喜爲酒池糟丘而  
牛飲者三千人喜聽讒用譽無功者賞無尺丈無錙銖  
無秤衡無功賞無罪誅此殷國之妖也

周靈王宮中二十三年起艮昭之臺二名宜昭之臺聚  
天下異木神工得嶠谷隱生之樹臺周足矣其木有龍  
蛇百獸之形飾水精爲泥高百丈升之以望雲色時有  
弘能招致神異王登臺忽見二人乘空而至乘遊飛之  
輦駕以青螭其衣皆絳緝毛羽王卽迎之上席時天下  
大旱地裂木然一人先唱能爲霜雪引氣一噴則雲起  
雪飛坐者皆口禁井池水堅可琢久設狐腋素裘紫熊  
大褥是西域所獻施於臺上又一人以指彈席上而暄  
風入室裘褥皆棄臺下

拾遺記

孔子返衛衛夫人南子使人謂之曰四方君子來者必

見寡小君孔子不得已見之夫人在錦帷中孔子北面稽首夫人自帷中再拜環珮之聲璆然

典畧

孔子喟然歎曰向使銅鞮伯華無死天下其定矣子路曰願聞其爲人子曰其幼也敏而好學其壯也有勇而不出其老也有道而能下人有此三者以定天下何難乎子路曰幼而好學壯而有勇則其可也若夫有道誰下哉子曰由汝不知也吾聞以衆攻寡無不克也以貴下賤無不得也昔者周公居冢宰之尊制天下之政猶下白屋之士日見百七十人斯豈以無道也欲得士之用也惡有道而無天下君子者乎

家語

古有阮師之刀天下之所寶貴也初阮之作刀受法於金精之靈七月庚辛見金神於冶監之門其人光色燁燿向而再拜神執其手曰子可教也既致之開宴設饌而問焉金神敎以水火之齊五精之鍊用陰陽之候取剛軟之和三年作刀千七百七十口其刀平背夾刀方口洪首截輕微絕絲髮之系所堅剛無變動之異

物理

論

晉平公使工爲弓三年乃成射不穿一札公怒將殺工其妻見公曰妾之夫造此弓亦勞矣幹生泰山之阿一日三覩陰三覩陽傳以燕牛之角纏以荆麋之筋糊以



河魚之膠此四者天下之選也而不穿一札是君不能射也妾聞射之道左手如拒石右手如附支右手發箭左手不知公以其儀而穿七札弓工立得出賜金三鎰

列女傳

晉平公夢見赤熊闢屏惡之而有病使問子產子產曰昔共工之卿曰浮遊旣敗於顓頊自沒沉淮之淵其色赤其言善咲其行善顧其狀如熊常爲天王祟見之堂用正天下者死見堂下則邦人駭見門則臣憂見庭則無傷窺君之屏病而無傷祭顓頊共工則瘳公如其言而疾間

瑣語

趙簡子上羊開阪羣臣皆偏袒推車而唐會擔戟行歌  
簡子曰寡人上阪羣臣推車會獨行歌不推車是會爲  
臣而侮其主其罪何若對曰臣侮主之罪當死死者身  
死妻子爲戮也君雖聞爲臣侮主之罪君亦聞爲人君  
而侮其臣者乎簡子曰何若對曰智者不爲謀辨者不  
爲使勇者不爲鬪夫智者不爲謀則社稷危辨者不爲  
使則指事不通勇者不爲鬪則邊境侵三者不使則君  
難保簡子乃罷推車

新序

韓聞秦之好興事欲罷之無令東伐乃使水工鄭國間  
說秦令鑿涇水自中山西抵瓠口爲渠並北山東注渭

三百里欲以溉田中作而覺欲殺鄭國鄭國曰始臣爲  
間然渠成亦秦之利也卒使就渠渠就而用注四萬餘  
頃收皆畝一鍾於是關中爲沃野秦以富強因命曰鄭  
國渠

史記

朔人獻燕昭王以大豚曰養彘若使曰豕也非大圃不  
居非人便不珍今年百二十矣人謂豕仙王乃命豕宰  
養六十五年大如沙墳足如不勝其體王異之今衡官  
橋而量之折十橋豕不量又命水官舟而量其重千鈞  
其巨無用燕相謂王曰奚不嚮之王乃命水夫膳之夕  
見夢於燕相曰造化勞我以豕形食我以人穢吾患其

生从矣仗君之靈得化吾生始得爲魯津之伯燕相游  
乎魯津有赤龜奉臂而獻一二夜光珠

符子

趙孝成王曰誰能當武安君平原君曰渑池之會臣秦  
武安君小頭而銳瞳子黑白分明視瞻不轉小頭而銳  
斷敢行也目黑白分見事明也視瞻不轉執志強也可  
與持久難與爭鋒廉頗足以當之

嚴尤三將敘

中山陰姬與江姬爭爲后司馬喜請見陰姬公爲畫計  
公稽首曰誠如君言喜卽奉書詣中山王曰臣聞趙強  
卽中山弱臣能弱趙而強中山中山王悅而見之喜曰  
臣願乞之趙觀其地形險阻人民貧富君臣賢不肖商

推爲資未可豫陳也乃見趙王曰臣聞趙天下善爲音  
容佳麗之所出也今來至境入都邑人民謠俗容貌后  
色殊無佳麗好美者以臣所見多以周流無所不至未  
嘗見人如中山陰姬者不知者將以爲神其容貌顏色  
過絕人矣乃其眉准類權衡犀角偃月彼乃帝王之后  
非諸侯之姬趙王大悅曰吾願請之何如對曰非臣所  
敢議願王無泄喜歸報中山君曰趙王非賢王也不好  
道德而好聲色不好仁義而好勇力聞其乃欲請陰姬  
中山君作色不悅喜曰趙強國也請之必矣王不與之  
卽社稷危與之卽爲諸侯笑王立爲后以絕趙王請可

也遂立爲后趙王亦無請也

戰國策

李斯長男由爲三川守諸男皆尚秦公主女悉嫁秦諸公子李由告歸咸陽李斯置酒於家百官長令皆斯前爲壽門庭車騎以千數李斯慨然而嘆曰嗟乎吾聞之荀卿曰物禁太盛斯乃上慕布衣閭巷之黔首上不知其驚困遂擢至此當今人臣之位無居臣上者可謂富貴極矣物極則衰吾未知所統駕者也

太平御覽

蘇秦困不得志如趙逢其隣子易水上從貸布一疋約價千金鄰子弗與一布爲千金之償利極厚矣而鄰子不與彼知千金非秦所有而不知秦能有之於異時也

衛青少時有一蚼徒相青官至封侯青笑曰人奴之生  
得無笞罵卽足安得封侯事平方貧賤時豈惟人不已  
信已亦不能自信矣

解冬序錄

秦始皇太后不謹幸郎嫪毐封爲長信侯爲生兩子毐  
專國事浸益驕奢與侍中左右貴臣棋博飲酒爭言而  
聞瞋目大呼曰吾乃皇帝之假父也寡人子何敢與我  
亢所與聞者走自始皇始皇大怒毐因作亂戰咸陽官  
始皇取毒四支車裂之取其兩弟囊僕殺之取皇太后  
遷之咸陽宮下令曰敢以太后事諫者戮而殺之闕下  
諫而死者二十七人茅焦乃上謁諫始皇遂以千乘萬

騎自迎太后歸咸陽太后喜大置酒待茅焦及飲太后  
曰抗在令直使敗更成安秦社稷使妾母子復得相會  
茅君之力也

太平御覽

秦始皇好神仙之事求天下異術有宛渠之民乘蠡舟  
泛黑水而至於雍部始皇與之語及天初開之時如親  
見始皇問曰聞子明於見遠願聞其術對曰臣之國去  
咸池日沒之所九萬里焉日月之所不照以萬歲爲夜  
其晝則天豁然中開濶數百丈萬歲還合則爲一日也  
及其爲夜琢燃石以代日光此石出於然山其土石皆  
自光明鑱斬皆火出大如栗則暉曜一室昔炎帝時火



石國人獻此石也

王子年拾遺記

武帝時有所幸倡郭舍人者發言陳辭雖不合道然令  
人主和悅武帝少時東武侯母常養帝帝壯時號曰大  
乳母率一月再朝朝奏入有詔使幸臣馬遊卿以帛五  
十疋賜乳母有詔得令乳母乘車行馳道中當此之時  
公卿大臣皆敬重乳母乳母家子孫奴從者橫暴長安  
中當道製頗人車馬奪人衣服聞於中不忍致之法有  
司請徙乳母家室處之於邊奏可乳母當入至前面見  
私乳母先郭舍爲下泣舍人曰卽入見辭去勿疾步數  
還顧乳母如其言謝去郭舍人卽言罵之曰咄老女子

何不疾行陛下已壯矣寧向須汝乳而活耶於是武帝  
憐之乃下詔止無徙乳母

史記

北海周澤字雉都爲太常恒齋有疾其妻憐其年老被  
病闕內問之澤大怒以爲干齋掾吏叩頭爭之不聽遂  
收送詔獄并自劾謝論者譏其激發不實又諺曰居世  
不諧爲太常妻一歲三百六十日三百五十九日齋一  
日不齋醉如泥旣作事復低迷

漢官集

河間王政傲狠不奉法帝以侍御史沈景有彊能擢爲  
河間相景到國謁王王不正服箕踞殿上侍郎贊拜景  
時不爲禮問王所在虎賁曰是非王邪景曰王不服常

人何別今相謁王豈謁無禮者邪王慙而更服景然後拜出請王傳責之曰前發京師陛見受詔以王不恭使相檢督諸君空受爵祿曾無訓導之義因捕諸姦人奏案其罪出冤獄百餘人政遂改節悔過自修

涉世雄談

上嘗至柏谷夜接亭長亭長不內乃宿於逆旅逆旅翁謂上曰汝長大多力當勤種稼穡何忽帶劔羣聚夜行動衆此不欲爲盜則淫耳上默然不應有頃還內上使人覘之見翁方耍少年十餘皆持弓矢刀劔欲圖上嫗曰吾觀此丈夫非常人也不如因禮之出謂上曰此翁好飲酒狂悖今日且令公子安眠無他因殺雞作食平

時上去是日還宮乃召逆旅夫妻見之賜嫗金十斤其夫爲羽林郎自是懲戒希復微行

漢武故事

詔召玄武司馬班固問定禮制之儀固曰京師諸儒多能說禮宜廣招集共議失得帝曰作舍道傍三年不成會禮之家名爲聚訟互生疑異筆不得下昔者堯作大章一夔足矣章和元年乃召曹褒詣嘉德門持班固所上叔孫通漢儀十二篇勅褒曰此制散略多不合經令宜依制條使可施行褒於南宮東觀考正舊禮上自天子至於庶人冠婚吉凶終始制度以爲一百五十篇

曄後漢書

南匈奴左薁鞬臺耆等反東羌復舉種應之安定屬國都尉張奐初到職壁中唯有二百許人聞之卽勒兵出軍吏叩頭爭止之不聽遂進屯長城收兵遣將王衛招誘東羌因據龜茲縣使匈奴不得交通東羌諸豪遂相率與奐共擊薁鞬等破降之羌豪遺奐馬二十匹金鐻八枚奐以酒酹地曰使馬如羊不以入厩使金如粟不以入懷悉以還之前此八都尉率好財貨爲羌所患苦及奐正身潔已無不悅服威化大行

涉世雄談

齊武王縝字伯升光武之長兄也性剛毅慷慨有大節自王莽篡漢常憤憤懷復社稷之慮不事家人居業傾

身破產交結天下雄俊莽末盜賊羣起南方尤甚續召諸豪傑計議曰王莽篡虐百姓分崩今枯旱連年兵革並起此亦天亡之時復高祖之業定萬世之秋也衆皆然之

後漢四王傳

漢馬援誡兄子曰吾欲汝曹聞人過失如聞父母之名耳可得聞而口不可得言也好論議人長短妄是非正法此吾所大惡也寧死不願聞子孫有此行也汝曹知吾惡之甚矣所以復言者施衿結襪申父母之誠欲使汝曹不忘之耳龍伯高敦厚周慎口無擇言謙約節儉公正有威吾愛之重之願汝曹效之杜季良豪俠好義

憂人之憂樂人之樂清濁無所失父喪致客數郡畢至  
吾愛之重之不願汝曹效之也效伯高不得猶爲謹勅  
之士所謂刻鵠不成尚類鶩者也效季良不得陷爲天  
下輕薄子所謂畫虎不成反類狗者也

漢書

光武問趙憙以長久之計憙請遣諸王就國上遂遣魯  
王與齊王石就國初馬援兄子壻王磐平阿侯仁之子  
也王莽敗磐擁富貲爲游俠有名江淮間游京師與諸  
貴戚友善援謂姊子曹訓曰王氏廢姓也子弟當屏居  
自守而反游京師長者用氣自行多所陵折其敗必也  
後歲餘磐坐事死磐子肅復出入王侯邸第時禁網尚

疎諸王皆在京師競修名譽招游士馬援謂司馬呂种  
曰建武之元名爲天下重開自今以往海內日當安耳  
但憂國家諸子並壯而舊防未立若多通賓客則大獄  
起矣卿曹戒慎之至是有上書告肅等受誅之家爲諸  
王賓客慮因事生亂會更始子壽光侯鯉得幸於沛王  
怨劉盆子結客殺故式侯恭帝怒沛王坐繫詔獄三日  
乃得出因詔郡縣收捕諸王賓客更相牽引死者千數  
呂种以與其禍臨命歎曰馬將軍神人也

後漢書

蔡茂字子禮建武二十年代戴涉爲司徒在職清儉匪  
懈茂初在廣漢夢在大殿之極上有三穗禾茂跳取之



得其中穗輒復失之主簿郭賀離席慶曰大殿者官府之形象也極而有禾人臣之上祿也取其中穗中台之位於宇禾失爲秩雖曰失之乃以得祿秩也衮職有關君其補之旬月而茂徵焉辟賀爲掾

范曄後漢書

李充延平年中詔公卿中二千石各舉隱士大儒務取高行以勸後進將徵充爲博士侍中大將軍鄧騭貴戚傾時無所下借以亮高節每卑敬之嘗置酒請賓客滿堂酒酣騭跪曰幸託椒房得列上將幕府初開欲辟天下奇偉以匡不逮惟諸君博求其器充乃爲陳海內隱居懷道之士頗存不合騭欲絕其論以肉噉之充搥肉

於地曰說士猶甘於肉遂出徑去隲甚望之

後漢書

宋穆之年二十爲郡督郵迎新太守到界上太守見穆之問曰君年少爲督郵將因族世自有令德穆之曰郡中瞻仰明公以爲孔子非顏淵不敢使迎太守大奇其才問曰貞婦孝子隱闇未彰言於府穆之曰方今聖化大行文武未墜於地家有貞婦戶有孝子比屋連棟不可勝記太守歎曰吾非仲尼督郵所謂顏回者也

張璠

漢記

吳主孫休創八字名其子

靈

苒

迄

寘

觥

舜

何音礦

王音賢

詎

莽

昆

舉

寇

褒

熒

權

武后命宗秦客改十二字行之制以

聖爲名取日月當空之義南漢劉巖亦制龔字龔爲名  
取飛龍在天之義其妄如此魏江式言世易風移文字  
改變篆形錯繆隸體失真談辨之士加以意說炫惑於  
時乃以追來爲歸巧言爲辨小兒爲黽神蟲爲蠶如斯  
甚衆顏氏家訓云北朝喪亂之餘書迹鄙陋加以專輒  
造字乃以百念爲憂言反爲變不用爲罷更生爲甦先  
人爲老如此非一徧滿經傳二公之言其致感於同文  
之盛乎唐君臣正論武后改易新字如以山水土爲地  
十千萬萬爲年永主久王爲證長正主爲聖一忠爲臣  
一生爲人一人大吉爲君然嘗攷之但有基羣惠生四

字合證作鍾君作風與正論所言不同宋人記其時有  
上俗書者養爲矮養爲齋閨爲穩奎亦爲穩仆音孀小  
兒也丕音勒人瘦弱也丕音終人亡絕也𠂔音臘人不  
能舉足也𠂔音大大女及姊也𠂔音礪山石之巖窘也  
門音櫟門橫關也余音酋言人在水上也次音魁言沒  
人水下也𠂔和𠂔切言隱身忽出驚人之聲也𠂔音胡  
言多髭也并東敢切以石擊水之音也如此者不一而  
足字義雖甚淺鄙而偏傍亦有依附今雲南夷俗謀訟  
彼欲誣陷人動曰𠂔灌賴之事𠂔字惟見雲南耳餘冬

𠂔

魏陳王曹植詩曰有美一人被服纖羅妖姿艷麗蒼若  
春花紅顏韡韡雲髻戔戔彈琴撫節爲我絃歌清濁齊  
均旣亮且和取樂今日遑恤其他又雜詩曰南國有佳  
人容華若桃李朝遊江海岸夕宿瀟湘沚時俗薄朱顏  
誰爲發皓齒俛仰歲時暮榮曜寧久恃又美女篇曰美  
女妖且閑採桑岐路間攘袖見素手皓腕約金環頭上  
金爵釵腰佩翠琅玕明珠交玉體珊瑚間木難羅衣何  
飄颻輕裾隨風還顧盼遺光彩長笑氣若蘭行徒用息  
駕休者以忘食借問女何居乃在城南端青樓臨大路  
高門結重關容華暉朝日誰不希令顏

尹牙字猛德太守南陽滿寵下車牙以德進幹任喉舌  
寵雖當國厚祿而懷愧戚見於顏色牙常用怪焉曰伏  
見明府四節悲歎有慘瘁之思何也寵謂牙曰父爲毛  
周張所害重仇未報並與戴天非孝子雖官尊祿重而  
耻未報是以長愧而無耻也聞孝馬牙與校園交通遂  
充騶馬之戢乃先醉張近侍以夜解縱諸馬令之亂駭  
知張必將今起伏側階下張果出問其故牙因手刃張  
首而還

廣州先賢傳

先主遣少府徐詳至魏魏太祖謂詳曰孤比者若越橫  
江之津與孫將軍遊姑蘇之臺獵長洲之苑吾志足矣

詳對曰大王欲奉至尊以合諸侯若越橫江而遊姑蘇  
是踵亡秦而蹈夫差恐天下事去矣太祖曰徐生得無  
逆詐乎

吳志

丁邕字叔春正直不撓舉孝廉爲郎以令史次輔也世  
祖改用孝廉選邕補爲郎邕稱疾不就詔問實病羞爲  
郎乎對曰臣實不病以孝廉爲令史職爾世祖怒使虎  
賁杖之數千詔問欲爲郎否邕曰能殺臣者陛下也不  
能爲郎者臣也詔出不爲郎

三輔次錄

羊祜爲征南大將軍督荊州諸軍事祜以孟獻營武牢  
而鄭人懼晏嬰城東陽而萊子服乃達據險要開建五

城取膏腴之地奪吳人之資右城以西盡爲晉有自是  
前後降者不絕乃增修德信以懷柔初附慨然有吞吳  
之心每與吳人交兵尅日方戰不爲掩襲之計將帥有  
欲進謫詐之策者輒飲以醇酒使不得言人有掠吳二  
兒爲俘者祐遣送還其家後吳將夏祥邵顗等來降二  
兒之父亦率其屬與俱吳將陳尚潘景來寇祐追斬之  
美其死節而厚加殯歛景尚子弟迎喪祐以禮遣還吳  
將鄧香掠夏口祐募生縛香旣至宥之香感其恩率部  
曲而降祐出軍行吳境刈穀爲糧皆計所侵送絹償之  
每會衆江沔遊獵常止晉境若禽獸先爲吳人所傷而



爲晉兵所得者皆封還之於是吳人翕然悅服稱爲羊公不之名也祐與陸抗相對使命交通抗稱祐之德量雖樂毅諸葛孔明不能過也抗嘗病祐饋之藥抗服之無疑心士多諫抗抗曰羊祐豈醜人者時談以爲華元子反復見於今抗每告其戍曰彼專爲德我專爲暴是不戰而自服也各保分界而已無求細利孫皓聞二境交和以詰抗抗曰一邑一鄉不可以無信義况大國乎臣不如此正是彰其德於祐無傷也

晉史

夏統字仲御會稽人常學戲般其母疾市藥於洛陽賈充問而訪之曰卿居海作何戲仲御曰能戲般耳充因

命焉仲御卽登舟鼓枻爲鯁鮪之歌學鯁鮪之狀俄雲  
霧杳冥白魚躍入其舟充甚異之因就與語仲御不對  
充整服謝之仲御引車而去弗之見也充乃歎曰可謂  
休人心石哉初仲御在鄉人也或說之使任仲御勃然  
作色謂之曰我安能遂俗低眉下意乎聞君之言不覺  
韓毛競豎白汗四匝顏如渥丹心如炙舌不住齒口  
不能將兩耳閉塞雙眸俱瞑也遂竟不往

王隱晉書

崔瞻在御史臺恒於宅中送食備盡珍羞別室獨食處  
之自若有一河東人士姓裴亦爲御史伺瞻便往造焉  
瞻不與交言又不命匕筯裴坐觀瞻食罷而退明日裴

自携七筯恣情飲瞰瞻方謂裴云我初不喚君食亦不  
共君語君遂張不拘小節昔劉毅在京口冒請鷺炙豈  
亦異於是乎君定名士於是每與同食

北齊書

晉隆安四年陳郡周顒文以蘊藻行潦祠於梁先生之  
墓夫子邁志箕穎塵垢離俗骨秀風霜性淳寡欲娶待  
偕隱之儷文絕陪臣之錄遂負策周魯之郊逆旅吳會  
之阿可謂高奇絕倫孤生莫和者也後學撫牘得人在  
文忽以知命而展其墳芒芒積草有馥餘芬昔先生過  
延陵而想季經海隅而感連苟踐迹而趣合亦斷金於

當年

周顒文祭梁鴻文

李敏美姿容善騎射開皇初周宣后樂平公主有女娥  
英妙擇婚對勅貴公子弟集弘聖宮者日以百數公主  
選取敏禮儀如帝女後將侍宴公主謂敏曰我以天下  
與至尊唯一女夫當爲汝求柱國若授餘官慎無謝及  
進見上親御琵琶敏舞大悅爲公主曰敏何官對曰一  
白丁耳上謂敏可授儀同敏不荅上曰不滿爾意邪令  
授開府又不謝上曰公主有大功於我敏乃拜蹈舞遂  
於坐發詔授敏柱國

北史

石家金谷重新聲明珠十斛買娉婷此日可憐只自許  
此時可愛得人情君家閨閣不曾難恒持歌舞借人看

意氣雄豪非分理驕矜勢力橫相干辭君去終不忍徒  
勞掩面傷鉛粉百年離別在高樓一代紅顏爲君盡喬  
知之綠珠篇

梁琛使秦琛從兄奕先在秦爲尚書郎會罷秦主欲令  
琛止奕舍琛語有司曰昔諸葛亮兄弟各處三國及其  
聘集公朝相見退無私面君子之志余敢忘乎竟不止  
奕數就邸舍因問東國起居琛曰今二方鼎據兄弟並  
蒙附寵論心各有所在今欲以東國事語君恐非西國  
之所欲聞何以見問燕書  
有龍淵者桓靈時善相人也於聽聲音尤妙二千石相

者龍淵下床贊之令長起侍贊之自六百石以下皆坐而言之先相張濟當以財得三公濟常依淵以觀視有相者輒往求之會解瀆侯往相至門問當有至相何憂貧乎侯去淵謂濟曰可厚事之濟遂往盡爲償債別數百萬修居業桓帝崩無嗣解瀆侯入爲太子而濟遂至

司空

始學篇注

宋高祖微時嘗遊會不過孔靜宅靜正晝臥有神人衣服非常謂之曰起天子在門旣而失之靜遽出適與帝遇延入結交贈遺臨別執帝手曰卿後必當大貴願以嗣身爲託帝許之及定京邑靜自山陰令擢爲會稽內

史述異記

樂浪王萬壽孫忠明帝時位太常少卿孝武帝汎舟天  
泉池命宗室諸王陪宴忠愚而無智性好衣服着紅羅  
襦綉作領碧袖袴錦爲緣帝謂曰朝廷衣冠應有常式  
何爲着百戲衣忠曰自少來所愛情存綺羅歌衣儻服  
是臣所願帝曰人之無良乃至此乎

後魏書

宋公至長安得姚泓時故太官承程季者了了人也公  
曰今日之食何者最先季曰仲秋御景離蟬欲靜變變  
曉風淒淒夜冷臣當此時唯能說餅公曰善季乃稱曰  
安定噎鳩之麥雒陽董德之磨河東長若之葱隴西蚨

背之犢抱罕赤耻之羊張掖北門之豉燃以銀屑煎以銀銚洞庭負霜之橘仇池車帶之椒調以濟北之鹽剉以新豐之雞細如華山玉屑白如梁甫銀涅旣聞香而口悶炙見色而心迷公曰善

梁吳均餅說

梁武帝時張僧繇吳人也天監中爲武陵王國侍郎真秘書閣知畫事武帝宗釋佛寺多僧繇畫之時諸王在外武帝思之遣僧繇乘傳寫貌對之如面江陵天皇寺明帝置也內有栢堂僧繇畫廬舍那佛及仲尼十哲帝怪問釋內如何畫孔聖僧繇曰後當賴此耳及後代滅佛法焚天下寺塔獨以殿有宣尼像乃不令毀拆又金



陵安樂寺畫四龍不點眼睛卽恐飛去人以爲妄誕固請點之須臾雷電破壁兩龍騰乘雲上天二龍未點眼睛者見在又畫天竺二胡僧侯景亂散析焉一僧爲唐右常侍陸堅所寶堅疾篤夢二胡僧告云我有同友離析多時今在洛陽李家若求合得之當以法功助君堅以錢帛果於其處購得之其疾乃愈

歷代名畫記

宋世祖與羣臣至寵姬殷貴妃墓謂劉德願曰卿等哭貴妃若悲者當加厚賞德願應聲便號慟涕泗交橫上甚悅以爲豫州刺史上又令醫術人羊志哭貴妃志亦嗚咽甚哀他日有問志者卿那得此副急淚志荅曰我

爾日自哭亡妾耳

沈約宋書

隋大業中有波斯胡人牧駝於俱紛摩他那之山忽有獅子從地踊出人語謂之曰此山西今有三穴穴中有兵器汝可取之穴中有刀及槊刀甚多石上有文教反叛於是糾合亡命渡恒暢水劫商族其衆漸盛遂割據波西境自立爲王波斯沸荪各遣兵討之及爲所敗其王姓太倉名噉密模臚白云有國已三十四年歷三王矣

太平御覽

太業中煬帝徵天下驍果之士以伐遼左沈光預焉同類數萬人皆出其下光將詣行在所賓客送至灞上者

百餘騎光酌酒而誓曰是行也若不能建功立名當死於高麗不復與諸君相見矣及從帝攻遼東以衝梯擊城竿長十五丈光昇其端臨城與賊戰短兵接殺數人賊竟擊之而墜未及於地適遇竿上有垂組光接而復上帝望見壯異之馳召與語大悅卽日拜朝請大夫賜寶刀良馬恒致左右親顧漸密

隋書

煬帝開河成取吳越民間女年十五六者五百人謂之殿脚女至於龍舟每綵纜一條女十人牽之間以羊十口時盛暑翰林學士虞世基獻計請用垂柳栽於汴梁兩堤上一則樹根四枝鞠護河堤二則牽舟之女獲其

陰三則牽舟之羊食其葉上大喜詔民間有柳一株實  
一縑百姓競獻之帝自種一株羣臣次第種方及百姓  
民謠曰天子先栽然後百姓栽栽畢帝御筆賜垂柳姓  
楊曰楊柳也

開河記

唐吳道玄窮丹青之妙大約宗師張僧繇玄宗天寶中  
忽思蜀中嘉陵江水遂假吳生驛遞令往圖之及廻帝  
問其狀奏曰臣無粉本並記在身心上遣於大同殿圖  
嘉陵江三百里山水一日而畢時有李將軍山水擅名  
亦畫大同殿數月方畢玄宗云李思順數月之功吳道  
玄一日之跡皆極其妙又畫殿內五龍鱗甲飛動每欲

大雨卽生烟霧吳生常持金剛經當天寶中有庭光與之水名潛畫吳生真雜講席衆人之中吳生觀之一見便驚語庭光云老夫貌醜何用圖之

唐書斷太平御覽

神龍三年吏部尚書蘇瓌案問鄭普思其妻有寵於常庶人特勅命對御辨析上屢抑瓌而理普思侍御史范獻忠歷階曰臣請先罪蘇瓌上問其故曰蘇瓌國之大臣荷榮貴久矣不能斬逆賊而後聞奏令使眩惑天聰搖動刑柄而普思反狀昭露陛下曲爲申理此則王者不死令聖躬萬福豈有剝天子耶臣請先死終不能事普思上意乃解獄遂定

唐書

唐太宗每當大陣望賊中驍將銳士炫曜人馬出入來去者意頗怒之輒命秦叔寶往取焉叔寶應命躍馬負鎗而進必刺之萬衆之中人馬俱倒太宗因以是重之叔寶亦以此頗自矜尚貞觀以後恒多病病每謂人曰吾少長戎馬所經二百餘陣屢中重瘡計吾前後出血亦數斛矣何能不病乎及卒太宗甚傷惜久之贈徐州都督陪塋於昭陵令所司於其塋內立石人馬以旌戰之功焉

唐書

貞觀初僅有牧牝三千匹從赤岸澤徙之隴右十五年始令太僕卿張萬歲勾當羣牧至麟德四十年間馬至

七十萬六千匹置八使願六監初置四十八監跨蘭渭  
秦原四州之地猶爲隘狹更析八監布於河曲其時天  
下以一縑易一馬儀鳳三年少卿李思文檢校隴右諸  
牧監方稱使爾後或戎狄外侵或牧圉乖散泊乎垂拱  
漸耗大半開元初牧馬二十四萬匹十三年加至四十  
五萬匹初有牛三萬五千頭是年有五萬頭初有羊十  
一萬二千口是年有二十萬六口盛於垂拱

唐紀

大曆初有才人張紅者本與父唱歌丐於衢路因過將  
軍韋青所居青於看街窓中聞其歌喉嘹亮仍有美色  
卽納爲姬其父亦舍於後戶優給之乃自得其藝類

絕倫當有樂工自撰一曲卽古曲長命西河女也加減其節奏頗有新聲未進間先印可於青青潛令紅於屏風後聽之紅乃以小豆數合以記其節拍樂工歌罷青因入問紅何如紅曰已唱得矣青出給云某有女子弟久曾唱非新曲也卽令隔屏唱之一聲不失樂工大驚異遂請相見歎伏不已乘云此曲先有一聲不穩今已正矣尋達上聽翌日召入宜春院寵澤隆異宮中號爲記曲娘子尋爲才人一日內使奏韋青卒上告紅紅乃於上前嗚呼奏云妾本風塵丐者一旦老父死有所歸致身入內皆自韋青妾不忍忘其恩一慟而絕上嘉歎



之久之卽贈昭儀常青者本土人也嘗自爲詩云三代掌綸誥一身能唱歌青官至金吾將軍

樂府雜錄

波利質多羅香拘鞞阇羅樹香曼陀羅花香曼殊沙華香須臾那華香闍提華香末利花香簷蔔花香波羅花香青蓮花香白蓮花香赤蓮花香旃檀香沉水香多摩羅拔香多伽羅香象香馬香男香女香

事物紀原

後唐時龍輝殿內安殿山水一鋪沉香爲山阜薔薇水蘇合油爲江池芩藿丁香爲林樹薰陸爲城郭黃碧檀爲屋宇白檀爲人物方圓一丈三尺城門揭一小牌曰靈芳國

德宗皇帝以朱泚之難幸梁洋中書舍人齊映從駕至北以見旌旗蔽野上心駭謂泚之追兵疾路至此見梁師嚴震具軍容拜馬前敘君臣離亂流涕久之上喜令震登馬與朕作主人映曰嚴震與至尊導馬御膳自有所司頃之上次洋州行宮召映責以儒生不達兵機烟塵時務姑息主帥映奏曰山南士庶只知有嚴震不知有陛下且今天威親臨令巴蜀士民知天子之尊亦足以盡嚴震爲臣子之節上歎之良久震聞特拜謝映時議多之卽此川也

唐史

賈直言父道冲德宗朝漏洩禁中事帝怒賜鴆酒直言

白中使請自執器以飲父因自飲之立死酒自左足洞  
出復生便具奏流其父并直言於南海遇赦還以勁直  
聞爲鄆帥以縻郡職劉悟殄東平之強直言之謀也朝  
廷以功就徵拜諫議大夫悟上表乞畱委以戎事太和  
初授絳郡太守每話所經之事自云始飲鴆志在必死  
卒然覺痛治五內至支節其痛愈於鑽灼摩頂放踵不  
可名狀天陰則又甚焉胗其胠及足脛色皆如墨有傷  
攻出六濃液紫瘀臭敗逆搶人鼻達數十步外唯食啖  
無減始知何遜之好不誣矣自絳除壽春竟終天年七

十有六

續定命錄

李林甫子壻鄭平爲戶部員外嘗與林甫同處一日林甫就院省其女遇平方櫛髮見林甫坐處甘露羹取而食之曰縱當華皓必轉髮黑明日果有中使至賜林甫食中有甘露羹遂以與平平食訖一旦髮毛如髻嶺表異錄曰交趾之人重不祿羹羹以羊鹿雞猪肉和骨同一釜煮之令極肥濃漉去肉進之葱姜調以五味貯以盆噐置之盤中羹中有嘴銀杓可受一升卽揖讓多自主人先舉卽滿斟一杓內嘴入鼻仰首徐傾之飲盡傳杓如酒巡行之喫羹了然後續以諸饌謂之不錄會交趾人或經營事務彌縫推要但備此會無不諧者

明皇雜錄

荀崧小女灌幼而奇節崧爲襄城太守爲杜魯所圍力  
弱食盡欲投於故吏平南將軍石覽計無所出灌時年  
十三乃率勇士數十人踰城突圍夜出賊追甚急灌篤  
厲將士且戰且前得入楊山獲兔向覽乞師又爲崧書  
與南中郎將周訪仍結弟兄訪卽遣子撫率三千人會  
石覽俱救崧賊聞兵至散走灌之力也

華陽國志

東魏高歡將兵二十萬趣蒲津使高敖曹將兵三萬出  
河南時關中饑饉宇文泰所將不滿萬人屯恒農五十  
餘日聞歡將濟河乃引兵入關敖曹遂圍恒農長史薛  
琬言於歡曰西人連年饑饉故冒死入陝州欲取倉粟

今敖曹已圍陝城粟不得出但置兵諸道勿與野戰及  
於秋其民自應餓死寶炬黑獺何憂不降願勿渡河侯  
景曰今茲舉兵形勢極大萬一不捷猝難收歛不如分  
爲二軍相繼而進前軍若勝後軍全力前軍若敗後軍  
承之歡不從自蒲津濟河至馮翊謂魏刺史王羆曰何  
不降羆太乎曰此城是王羆豕欲死者來歡知不可攻  
乃涉洛軍於許原西秦至渭南徵諸州兵皆未曾欲進  
擊歡諸將以衆寡不敵請待歡更西以觀其勢秦曰歡  
若至長安人情大擾今及其新至可擊也卽造浮橋於  
渭令軍士齎三日糧輕騎渡渭十月至沙苑距東魏軍

六十里諸將皆懼宇文深獨賀曰歡鎮撫河北甚得衆心以此自守未易可圖今懸師渡河非衆所欲獨歡耻失寶泰復諫而來所謂忿兵可一戰擒也願假深一節發王羆之兵邀其走路使無遺類泰遣順昌公達奚武覘歡軍武從三騎皆效歡將士服至暮去營數百步下馬潛聽得其軍號因上馬歷營若警夜者有不如法往徃撻之具知敵之情狀而還歡聞泰至引兵來會李弼謂泰曰彼衆我寡不可平地置陳此東十里有渭曲可先據以待泰從之背水東西爲陳李弼趙貴爲左右拒命將士皆偃戈於葦中約聞鼓聲而起時晡時東魏兵

至斛律羗舉曰黑獺舉國而來欲一死決渭曲葦深土  
渟無所用力不如緩與相持密分精銳徑擦長安巢穴  
旣傾則黑獺不戰成擒矣歡曰縱火焚之何如侯景曰  
常生擒黑獺以示百姓若燒灰誰復信之彭樂盛氣請  
鬪曰我衆賊寡何憂不克歡從之東魏兵望見魏兵少  
爭進擊無復行列秦鳴鼓士皆奮起合戰李弼等帥鐵  
騎橫擊之東魏兵中絕遂大破之歡欲收兵更戰衆已  
盡去斛律金曰衆心離散不復用宜急河東歡乃馳去  
夜渡河喪甲士八萬人鎧仗十八萬秦追至河上選留  
甲兵二萬餘人餘悉縱歸李穆曰高歡破膽矣速追之



可獲泰不聽還軍渭南所徵之兵甫至乃於戰所人種柳一株以旌武功侯景言於歡曰黑獺驟勝而驕必不爲備願得精騎二萬徑往取之歡以告婁妃妃曰設如其言景豈有還理得黑獺而失景何利之有歡乃上高數曹聞歡敗釋恒農退保洛陽

五代史

周行逢妻鄧氏陋而剛決善治上嘗諫行逢周法大嚴行逢怒鄧氏因之村墅遂不復歸行逢屢遣迎之不至一旦自率童僕來輸稅行逢就見之曰夫人何自苦如此鄧氏曰稅官物也公不先輸何以率下且獨不記爲里正代人輸稅以免楚撻時邪行逢欲與之歸不可曰

公誅殺太過一旦有變村墅易爲逃匿耳行逢鄉唐德  
求補吏行逢曰汝才不堪爲吏吾今私汝則可矣汝居  
官無狀吾不敢以法貸汝則親戚之恩絕矣與之耕牛  
農具而遣之

涉世雄談

蜀張雲立朝謇諤自比朱雲宣徽使景潤澄曰昔朱雲  
請斬馬劍以斬張禹今上方只有殺雞刀卿欲用乎雲  
曰雞刀雖小亦可斬羣狗潤澄憾之

蜀檮机

蜀潘炕字凝夢其先河南人有器量家人未嘗見其喜  
怒然發於美妾解愁遂風恙成疾解愁姓趙氏其母夢  
吞海棠花蕊而生頗有國色善爲新聲及小詩建嘗至

炆第見之謂曰朕宮無如此人意欲取之炆曰此臣下  
賤人不敢以薦於君其實斬之弟峭謂曰綠珠之禍可  
不戒耶炆曰人生貴於適意豈能愛死而自不足於心  
耶人皆服其有守

蜀檮機

蜀王衍荒淫惑於宦人王承休遂決秦州之幸詔下中  
外切諫母后泣而止之以至絕食衍皆不從前秦州節  
度判官蒲禹卿叩馬泣血上表累千五百餘言且曰望  
陛下以名教而自節以禮樂而自防循道德之規受師  
傳之訓知社稷之不易想稼穡之最難惜高祖之基扃  
似太宗之臨御賢賢易色孜孜爲心無稽之言勿聽弗

詢之謀勿用聽五音而受諫以三鏡而照懷少止息於  
諸處林亭多看覽於前王書史別脩上德用卜遠圖莫  
遣色荒勿令酒惑常親政事勿恣閒遊又曰陛下與唐  
主方申歡好信幣交馳但慮聞道聖駕親行別懷疑忌  
其或專差使命請陛下境上會盟未審聖躬去與不去  
又曰陛下纂承以來率意頻離宮闕勞心費力有何所  
爲此際依然整蹕又擬遠別宸宮昔秦王之鑾駕不回  
煬帝之龍舟不返又曰忍教置却宗祧言將道斷使蒸  
民以何托令慈母以何辜若不慮於危亾但恐垂於仁  
孝又曰劉禪俄降於鄧艾李勢遽難於桓溫皆爲不取

直言不恤政事不信王道不念生靈以至國人心無  
一可保山河之險無一可憑衍竟不從行至綿谷唐師  
已入其境狼狽而歸遂降魏王繼岌當五代時忠義之  
士落落如晨星歐公作史嘗有五代無全人之嘆幸而  
有焉則又爲之咨嗟嘆息反覆不置如蒲禹卿之忠諫  
非特蜀之所少亦天下所希有也然史中曾不少槩見  
但云衍幸秦州羣臣切諫而已豈歐公偶失此耶

太平廣記

夏英公旣卒其家客鄆陵隣之謹僧有學解客嘗問之  
曰英公貪而喜殺其報如何曰以教言之當爲龍耳未  
以爲然也他日坐京師遇夏氏故吏語近其生曰徃夢

遇公于塗氣貌枯悴白衣故暗問其所在曰爲廬山東  
潭龍爾客始驚其後復至京師遇其故人於興國寺其  
隣有相語曰廬山東潭龍已去矣客又大驚往問之曰  
東潭隱密人所不至往歲木皆立槁人始至其上潭水  
清徹有白龍在焉夏日之中水沸而龍歿夜則復生冬  
結冰於數歲有僧十餘結廬其上爲之誦經又數歲而  
龍去草木復生英公奉釋故當困厄復能致僧爲之作  
福

後山談叢

李景讓母鄭氏性嚴明早寡家貧子幼每自教之宅後  
墻陷得錢盈船母祝之曰吾聞無勞而獲身之災也天

必以先君餘慶矜其貧而賜之則願諸孤學問有成此不敢取遽命僚而築之景讓宦達髮已班白小有過不免捶楚在浙西有牙將迂意杖之而斃軍中憤怒將爲變母聞之出坐廳事立景讓於庭而責之曰天子負汝以方面豈得以國家刑法爲喜怒之資而妄殺無罪之人乎萬一致一方不寧豈惟上負朝廷使垂老之母銜羞入地何以見汝之先人哉命左右褫其衣坐之將撻其背將佐皆爲之請久乃釋之軍中遂安弟景莊老于場屋每被黜母輒撻景讓然景讓終不肯屬主司曰朝廷取士自有公道豈可効人求關節乎

涉世雄談

徽宗在藥珠宮早膳李石周誚吳玠莫儔入言金人請  
上出郊議事便回上曰軍前莫有變否朕平日以爵位  
優卿等今日勿爲小利所誘中書舍人姜堯臣曰去則  
不得回矣石曰若信堯臣言必誤大事堯臣以笏擊石  
額血流仆地俄有禁卒報皇后已在南薰門上皇曰我  
去留未決何故皇后先出后曰昨日李石傳聖旨堯臣  
曰陛下不信臣言李石暗受金人官爵賣國利已上曰  
若以我爲質得官家回保祖宗社稷亦無恨矣乃行至  
南薰門番使催行上曰事果變矣堯臣曰果爲李石所  
賣番使以骨朵齧其口仆地上曰勿殺吾忠臣四太子



求王婉容爲黏罕子婦婉容自刎歿高宗自真定府逃  
回車騎至邢州李固渡馬斃冒雨行一日投宿楊嫗草  
舍嫗長子若水上書乞勿廢皇帝四太子埋土中亂箭  
射殺三人姓名不見於史傳而見於曹勛北狩錄佚醉編  
戶部尚書杏岡李公瓚嘗爲兵部主事言東山劉公大  
夏當孝宗之朝最爲得君公亦以天下爲任議汰冗  
食凡軍職皆以軍功爲準通查裁革旣得旨行之而  
一時侍衛將軍力士之流皆以才藝選初無軍功談司  
失于照詳類行報罷一時閼然時駙馬都尉樊凱管紅  
盔將軍特過兵部爲言此輩不宜裁革東山槩拒之凱

積不平適當 駕陞殿凱立午門外語諸人曰爾輩不  
用了昨已奉 旨裁革雖我亦無地位矣蓋激之也衆  
人遂散出 孝宗上殿平昔執爪帶刀之人皆不在儀  
衛簡寂恐恐不安屢顧左右問故既退遂宣樊駙馬面  
究凱奏昨兵部以行裁革去矣 孝宗大聲曰劉大夏  
敢如此 玉色不怡復宣兵部東山至走急氣促不能  
了了而裁革之事悉罷 聖眷遂衰矣夫以東山之公  
忠與 孝廟之有事事機一失乃至于此信乎臣不密  
則失身一時踈略甚可惜也該司可謂無人矣諺云俸  
門如鼠穴此言可以諭大

谿山餘話

周公之事文王也行無專制事無由已身若不勝衣言  
若不出口有所奉持於前洞洞屬屬如不能如將失之  
可謂能子矣及繼文武之業履天子之國則平夷狄之  
亂誅管蔡之罪無所故問感動天地聲懾海內可謂能  
武矣成王長北面致政委質而臣事之請而後行無擅  
恣之意無矜伐之色可謂能臣矣

淮南子

曰三洲人者各一洲人皆孤单竝獨三人闇會樹下息  
因相訪問老者曰寧可合爲斷金之業邪二人曰諾卽  
相約爲父子因命二人于大澤中作舍且欲成父曰此  
不如河邊二人曰諾河邊舍幾成父曰又不如河中二

人復填河二句不立有一書生過之爲縛兩土肫投河中會父往呼止之曰嘗見河填耶觀汝行耳相將而去明日俱至河邊望見河中土高丈餘

孝子傳

牛亭曰芍藥一名將離人欲相離則贈之以芍藥也文無一名當歸相招召則贈之以文無也丹棘一名忘思欲忘人之憂則贈之以棘也青裳一名合歡欲蠲人之忿則贈之以青裳也

博物志補

馮玄岳曰焦氏易林其辭古雅秀逸其中皆有深旨如曰人面鬼口長舌如斧斲破瑚璉殷商絕祀言女禍也多虛少實語不可知尊空無酒飛言如雨言讒昌也登

堦上堂見吾父兄左酒右漿與福相迎言退樂也南行  
載鎧登履九魁車傷牛罷日暮嗟咨戒行險也家在海  
隅橈短流深企立望宋無木以趨悲寡援也去莘就蓼  
毒愈酷甚避井入坑憂患日生卽詩人感感靡所騁之  
旨也三驪負衡南取芝香秋蘭芬馥利我少姜喻悅賢  
也長女三嫁進退多態譏不知止也千雀萬鳩與鵲爲  
仇威勢不敵雖衆無益畏權貴也大樹之子百條共母  
當夏六月枝葉盛茂鸞鳳以庇召伯遊暑翩翩偃仰各  
得其所羨吏隱也五婆解墮頓斬獨宿憂爲身福喜遠  
色也環緒倚鈕斗升屬口羞小利也敝笥在梁魴逸不

禁乃無政也三嫗治民不勝其任又三手六目政多煩  
惑戒多門也東風啟戶隱伏權喜懷仁澤也葛藟蒙棘  
華不得實疾佞蔽也他如張羅搏鳩烏麗其災如從螭  
見虎雖危無始如三狸捕鼠遮遏前後如天之與隅堯  
舜所居如酒爲歡伯除憂來樂如簪短帶長出思苦窮  
如乾作聖男坤爲智女如齟齬齧貧鬼相責如鳬鴈  
啞啞以水爲家如精誠所在神爲之輔如蹢躅踟蹰撫  
心搔頭如汶山蹲鴟肥脂多脂如戴鏡望天不見星辰  
如陰淫不止白馬爲海如方口圓舌爲知樞門如九鴈  
列陣雌獨不羣如雷君出裝隱隱西行如道涉多阪牛

馬蛇涎其語尤奇

山齋雜錄

士同風於朝農同業於野雖官職務殊地氣異宜然其  
致功成利未有相害而不通者也至乎末世則不然矣  
執法之吏不闕先王之典縉紳之儒不通律令之要彼  
刀筆之吏豈生而察刻哉起於几案之下長於官曹之  
間無溫裕文雅以自潤雖欲無察刻弗能得矣竹帛之  
儒豈生而迂緩也起於講堂之上遊於鄉校之中無嚴  
猛斷割以自裁雖欲不迂緩不能得矣先王見其如此  
也是以博陳其教輔和民性達其所壅祛其所蔽吏服  
雅訓儒通文法故能寬猛相濟剛柔自克也

王粲儒  
吏論

悲哉秋之爲氣也蕭瑟兮草木搖落而變衰僚慄兮若  
在遠行登山臨水兮送將歸沉寥兮天高而氣清寂寥  
兮收潦而水清憊悽增欷兮薄寒之中人愴怳懣恨兮  
去故而就新坎廩兮貧士失職而志不平廓落兮羈旅  
而無友生惆悵兮而私自憐燕翩翩其辭歸兮蟬寂漠  
而無聲鴈靡靡而遊兮鴟雞啁哳而悲鳴獨申旦而不  
寢兮哀蟋蟀之宵征時亶亶而過中兮蹇淹留而無成

宋子

君家誠易知悠思復難忘黃金爲君門白玉爲君堂堂  
上羅酒樽使作邯鄲倡中庭生奇樹華燈何煌煌兄弟



兩三人中子爲侍郎五日一來歸道上自生光黃金絡

馬頭觀石蒲路傍

古樂府詩

富則盛貧則病甚矣不惟形色羸縻或亦神心沮喪非  
但交友疏棄必有家人訟誤非廣潔深識者何能不移  
其植故欲蠲憂患莫若懷古之意當自同古人見深則  
憂淺識遠則患浮昔有琴歌於編蓬之中用此道也顏延之庭誥

菊河源傍悉生芳菊被徑浸潭流其滋液水極芳馨谷  
中有三十餘家不穿井仰飲此水上壽二三百中壽百  
歲七八十者猶不爲壽夫菊能輕身益氣令人久壽于

此有徵矣又後漢胡廣子伯始爲侍中久患風羸南飲  
此遂瘳焉

荊州記

詞人卽事睹景懷古思舊感慨悲吟情不能已今舉其  
最工者如劉禹錫金陵詩山圍故國周遭在潮打空成  
寂寞回淮水東邊舊時月夜深還過女牆來愚溪詩溪  
水悠悠春自來草堂無主燕飛回隔簾惟見中庭草一  
樹山榴依舊開又草聖數行留斷壁木奴千樹屬隣家  
惟見里門通德榜殘陽寂歷出樵車竇恐南游詩傷心  
欲問前朝事惟見江流去不回日暮東風春草綠鷓鴣  
飛上越王臺東坡昆陽城賦橫門谿以四達故道宛其

未改彼野人之何知方偃僕而畦萊張安國題黃州東坡詩老仙騎鶴去稚子飯牛歌蓋人已逝而迹猶存迹雖存而景隨變古今詞云語言百出究其意趣大槩不越諸此而近世倣倣尤多遂成塵腐亦不足貴矣

林下偶談

屈原既放三年不得復見竭知盡忠而蔽鄣於讒心煩慮亂不知所從乃往見太卜鄭詹尹曰余有所疑願因先生決之詹尹乃端策拂龜曰君將何以教之屈原曰吾將惘惘欸欸朴以忠乎將送往勞來斯無窮乎寧誅鋤草茅以力耕乎將游大人以成名乎寧正言不諱以危身乎將從俗富貴以媮生乎寧超然高舉自保真乎

將呶訾栗斯喔咿儒兒以事婦人乎寧廉潔正直以自  
清乎將突梯滑稽如脂如韋以絜楹乎寧昂昂若千里  
之駒乎將汜汜若水中之鳧與波上下偷以全吾軀乎  
寧與騏驎亢軛乎將隨駑馬之迹乎寧與黃鵠比翼乎  
將與雞鶩爭食乎此孰吉孰凶何去何從世溷濁而不  
清蟬翼爲重千鈞爲輕黃鍾毀棄瓦釜雷鳴讒人高張  
賢士無名吁嗟默默今誰知吾之廉貞詹尹乃釋策而  
謝曰夫尺有所短寸有所長物有所不足智有所不明  
數有所不逮神有所不通用君之心行君之意龜策誠  
不能知此事

屈子

有淵人亡珠于市於陵子過之而疑焉遂聽直於市長  
於陵子澤色亡與辯也市長投座起曰此於陵先生也  
天下所共與廉者今子獨穢及焉吾牀女尸巷術矣於  
陵子於是漂涕交臆怒不荷言市長曰夫貌不舉于知  
心神不抑于昧已固真人不爲世撼也今亡行亡敢謂  
知先生而廉先生彼淵人不足謂昧先生而盜先生然  
欣戚偪施庸有以邪於陵子感然曰夫木不戎乎斧斤  
而戎乎析械者爲身害小而名害大也今珠吾沒齒盜  
孰與廉吾百世盜邪蓋沒齒易盡百世亾忘亾忘誠所  
悲也市長曰夫行由表立名捷景赴廉奚盜也於陵子

曰子不聞赫胥之上大道百行匹夫共而不有庖犧之下元風夏德至人有而不矜迫夫五帝鑒民心心自私于是盜德行于五品相委盜知術于蒙樸未開公輸巧而衆人愚離朱明而天下瞽矣且其不近盜之日月而久盜之天地久不已也則聲盜之雷霆聲不已也則鬼盜之神明茲其情貌非古今所謂大盜邪今天下不幸而旅去其廉獨使大盜歸我哀微肩矣須更有拾遺者聞之以其珠詣市長市長曰於陵先生方悲盜廉也請子亡盜義我其敢盜能聽也哉

於陵子

張循王之兄保嘗怨循王不相援引循王曰今以錢十

萬緡卒五千付兄要使錢與人流轉不息兄能之乎保  
默然久之曰不能循王曰宜弟之不敢輕相援引也王  
嘗春日遊後圃見一老卒臥日中王蹴之曰何慵眠如  
是卒起身諾對曰無事可做只得慵眠王曰汝會做甚  
事對曰諸事薄曉如同易之類亦粗能之王曰汝能回  
易吾以萬緡付汝何如對曰不足爲也王曰付汝五萬  
對曰亦不足爲也王曰汝需幾何對曰不能百萬亦五  
十萬乃可耳王壯之予五十萬恣其所爲其人乃造巨  
艦極其華麗市美女能歌舞音樂者百餘人廣收綾錦  
奇玩珍羞佳果及黃白之藥募紫衣吏軒昂閑雅若書

司客將者十數輩卒徒百人樂飲逾月忽飄然浮海去  
逾歲而歸珠犀香藥之外且得駿馬獲利幾十倍時諸  
將皆缺馬惟循王得此馬軍容獨壯大喜問其何以致  
此曰到海外諸國稱大宋回易使謁戎王魄以綾錦奇  
玩爲招其貴近珍羞畢陳女樂迭奏其君臣大悅以名  
馬易美女且爲治舟載馬以犀珠香藥易綾錦等物餽  
遺甚厚是以獲利如此王咨嗟褒賞賜予優厚問能再  
往乎對曰此戲也再往則敗矣願仍爲退卒老園中鳴  
呼觀循王之兄與浮海之卒其智愚相去奚翅三十里  
哉彼卒者頽然其寢苔堦花影之下而其胸中之智圓



轉恢奇廼如此則等而上之若伊呂管葛者世亦豈盡  
無也哉特莫能識其人無繇試其蘊耳以一弊衣老卒  
循王慨然捐五十萬緡昇之不問其出入此其意度之  
恢弘固亦足以使之從容展布以盡其能矣勾踐以四  
封之内外付種蠡漢高皇捐黃金四十萬斤於陳平由  
此其推也蓋不知其人而輕任之與知其人而不能專  
任皆不足以有功視其一往之後辭不復再又幾於知  
進退存亡者異哉

鶴林玉露